

LIGJ
Nr. 61/2020

**PËR DISA NDRYSHIME DHE SHITESA NË LIGJIN NR. 43/2015, “PËR
SEKTORIN E ENERGJISË ELEKTRIKE”, TË NDRYSHUAR**

Në mbështetje të neneve 78 dhe 83, pika 1, të Kushtetutës, me propozimin e Këshillit të Ministrave,

KUVENDI
I REPUBLIKËS SË SHQIPËRISË

VENDOSI:

Në ligjin nr. 43/2015, “Për sektorin e energjisë elektrike”, të ndryshuar, bëhen këto ndryshime dhe shtesa:

Neni 1

Në nenin 3, pas pikës 91 shtohen pikat 92 dhe 93 me këtë përmbajtje:

“92. “Zyrtari i pajtueshmërisë” është një person fizik ose juridik, i pavarur, i përcaktuar nga Operatori i Sistemit të Shpërndarjes, i ngarkuar me monitorimin dhe raportimin mbi zbatimin e programit të pajtueshmërisë.

93. “Kabinë elektrike” është tërësia e mjeteve themelore dhe pajisjeve elektrike të lidhura në tensionin e mesëm dhe të ulët me rrjetin e shpërndarjes, funksioni i të cilave është të kontrollojnë lidhjen, të transformojnë, të transmetojnë dhe të matin energjinë elektrike që furnizohet ose prodhohet për lidhjet e reja apo modifikimin e lidhjeve ekzistuese të klientëve ose prodhuesve për këto nivele tensioni.”.

Neni 2

Në nenin 17, fjalía e dytë e pikës 4 shfuqizohet.

Neni 3

Në nenin 28, fjalía e parë dhe e dytë e pikës 5, si dhe pika 7 shfuqizohen.

Neni 4

Në nenin 31, pika 1 ndryshohet si më poshtë:

“1. Linjat e reja të interkoneksionit, që ndërtohen nga investitorët privatë, miratohen me vendim të Këshillit të Ministrave, me propozimin e ministrit përgjegjës për energjinë.”.

Neni 5

Në nenin 49, pika 2, pas shkronjës “h” shtohet shkronja “i” me këtë përmbajtje:

“i) zhvillimin e procesit konkurrues për miratimin e ndërtimit të kapaciteteve prodhuese të energjisë nga hidrocentralet.”.

Neni 6

Në nenin 60, pika 8 shfuqizohet.

Neni 7

Në nenin 69, pas shkronjës “b” shtohet shkronja “b/1” me këtë përmbajtje:

“b/1) bën mirëmbajtjen dhe riparimin periodik ose sipas nevojës së rastit të kabinave elektrike, të cilat janë në bashkëpronësi, apo në pronësi të të tretëve. Përfshihet janë përgjegjës vetë për mirëmbajtjen dhe riparimin e kabinave elektrike, klientët jofamiljarë privatë që shprehin vullnetin për kryerjen vetë të mirëmbajtjes dhe riparimit, si dhe kur kabina elektrike është me një përdorues.”.

Neni 8

Pas nenit 71 shtohet neni 71/1 me këtë përmbajtje:

“Neni 71/1

1. Kushtet teknike për ndërtimin dhe instalimin e pajisjeve në kabinat e reja elektrike, si dhe kriteret që duhet të plotësojnë subjektet që i ndërtojnë ato përcaktohen me vendim të Këshillit të Ministrave, me propozim të ministrit përgjegjës për energjinë, të cilat harmonizohen me rregullat dhe kushtet teknike ndërkombëtare. Këto kushte zbatohen për të gjitha kabinat elektrike në rast se riparimi ose modifikimi i tyre kalon mbi 25 % të volumit material dhe inventarit të kabinës, si edhe kur vlera e riparimit është më e lartë se 30 % të totalit të vlerës së kontabilizuar në momentin fillestar të regjistrimit të saj.

2. Vlerësimi i konformitetit të ndërtimit të kabinave elektrike kryhet nga organe të miratuara për këtë qëllim nga ministri. Rregullat dhe procedurat për miratimin e këtyre organeve miratohen me udhëzim të ministrit.

3. Shpenzimet për ndërtimin e kabinave të reja nga subjekte juridike dhe persona fizikë tregtarë mbulohen nga vetë bashkëpronarët.

4. Pronësia e kabinës elektrike është e përdoruesit, deri në amortizim të plotë të vlerës së asetit apo kur përdoruesi kalon pronësinë Operatorit të Sistemit të Shpërndarjes, sipas marrëveshjes së nënshkruar ndërmjet palëve. Pas amortizimit të plotë të vlerës së asetit, pronësia e kabinës kalon tek Operatorit i Sistemit të Shpërndarjes. Metodologjia e amortizimit të plotë të vlerës së kabinës elektrike propozohet nga Operatori i Sistemit të Shpërndarjes dhe miratohet me vendim të Entit Rregullator të Energjisë, bazuar në ligjin për kontabilitetin dhe standardet ligjore në fuqi për vlerësimin e aseteve dhe të pasurisë.

5. Çmimi i punimeve të ndërtimit dhe mirëmbajtjes së kabinave elektrike përditësohet në mënyrë periodike në manualin teknik të çmimeve të punimeve të ndërtimit dhe të analizave teknike të tyre, që miratohet me vendim të Këshillit të Ministrave.”.

Neni 9

Në nenin 72, pika 3, shkronjat “a” dhe “b” ndryshohen si më poshtë:

“a) të ketë të drejta të plota vendimmarrëse, të pavarura nga shoqëria e integruar e energjisë elektrike, lidhur me asetet e nevojshme për funksionimin, mirëmbajtjen ose zhvillimin e rrjetit të shpërndarjes.

Për të përmbushur këto detyra, operatori i sistemit të shpërndarjes duhet të ketë në dispozicion burimet e nevojshme, përfshirë burimet njerëzore, teknike, fizike dhe financiare.

Shoqëria mëmë (kontrolluese) ka të drejtën e mbikëqyrjes ekonomike dhe menaxheriale, në lidhje me kthimin e aktiveve, miratimin e planit ekonomik financiar ose çdo instrument tjetër

të barasvlershëm të Operatorit të Sistemit të Shpërndarjes dhe të vendosë kufijtë e përgjithshëm në nivelet e borxhit të shoqërisë bijë (të kontrolluar).

Shoqëria mëmë (kontrolluese) nuk mund të japë udhëzime për veprimtarinë e përditshme operationale të Operatorit të Sistemit të Shpërndarjes së Energjisë dhe nuk ka të drejtë të marrë vendime lidhur me ndërtimin apo rikonstruksionin e linjave të shpërndarjes, vlera e investimit të të cilave nuk tejkalon nivelet e planeve financiare të miratuara apo vlerat e përcaktuara në statutin e shoqërisë apo legjislacionin në fuqi;

b) të hartojë një program pajtueshmërie që përcakton masat që do të merren për të siguruar ndalimin e veprimeve diskriminuese, si dhe të sigurojë që respektimi i programit të monitorohet në mënyrën e duhur. Programi i pajtueshmërisë përcakton detyrimet specifike të punonjësve për përmbushjen e këtij objekti.

Personi ose organi përgjegjës për monitorimin e programit të pajtueshmërisë (zyrtari i pajtueshmërisë së Operatorit të Sistemit të Shpërndarjes) paraqet çdo vit në ERE një raport vjetor, i cili përcakton masat e marra në kuadër të programit të pajtueshmërisë. Ky raport publikohet në faqen zyrtare të ERE-s.

Zyrtari i pajtueshmërisë së Operatorit të Sistemit të Shpërndarjes është plotësisht i pavarur dhe ka akses në të gjitha informacionet e nevojshme të Operatorit të Sistemit të Shpërndarjes dhe çdo shoqërie të lidhur, për të përmbushur detyrën e tij.”.

Neni 10

Dispozitë kalimtare

Parashikimi i nenit 4, të këtij ligji, nuk zbatohet për subjektet që janë pajisur me “Miratim paraprak të ndërtimit të kapaciteteve të reja të energjisë”, në përputhje me legjislacionin në fuqi.

Neni 11

Aktet nënligjore

Ngarkohet Këshilli i Ministrave që, brenda 6 muajve nga hyrja në fuqi e këtij ligji, të nxjerrë aktet nënligjore në zbatim të neneve 4 dhe 8 të tij.

Neni 12

Ky ligj hyn në fuqi 15 ditë pas botimit në Fletoren Zyrtare.

Miratuar në datën 14.5.2020.

Shpallur me dekretin nr.11506, datë 8.6.2020 të Presidentit të Republikës së Shqipërisë, Ilir Meta.